

Il est r'venu l'timps des godets.

C'est yun des signes à què ç'qu'on voit qu'l'hivier s'ra bîrâte dallé èyè què l'printemps va pointér s'mouson dins nî lômint:les godets sont skèpis! Bîn seûr,il a des autès signes qui n'tromp'tè nî:El tchat gratte es'bouddenne.El pinchon s'estoumaque pou moustrér qu'il a un pu bia riptchiptchip què l'z'aut's.El pètit vièr' es deswan-ne du terreau in s'mèfiant du pierrot qui r'chène pusse à in F16 qu'à n'vieille manoque.El curé confesse branmint pu d'coummères qui vien'tè avouwér des ferdennes qu'on n'fait nî quand l djè! Enfin bref,du dalloû vo parlér des godets.

Pou les moins savants,el godet,ç'est « la jonquille »:ène belle fleûr djaune avû des grands pétâles qui ravis't'au ciel èyè ène longue tige forte qui n'a nî peu ni du vint ni dè l'pieuv'.

Quand l d'a saquantes er'louyées inchènes,ç'est l'pu bia des bouquets, surtout dins les mains dè l'pètitte djambotte qui vo l'propose au boûrd dè l'route.

Dins no région d'Houdé,il a ène tradition qu'l m'faut vo spliquî:AHoudé, quand on es't'amoureux,(ça arrive pu souvint qu'on n'pinse) on in va à l'Capelle du Bos pou **planter s'godet.**

Est-ç'què ç'est l'douceûr des fougères qui rattire lesmanbournés du coeur?
Est-ç'què ç'est l'câd' bucolique qui les fait fertèyî?

Du n'sais nî mais ce qu'du sais,c'est qu'on dit qu'on es't'in vrai homme quand on a planté s'godet!

Les cîns qui n'in sont pu à lun premî côup èn'sont nî moins fièrs,min-me si ç'n'est nî toudi avû l'minme qu'il in r'vont su les lieux dè l'plantation.(Ou bîn du r'piquâdje,ç'est comme vos voléz.)



El mois d'avril vînt d'couminchî donc vo z'avèz co l'timps!
Perdéz ène dèmi-heûre dins vo n'horaire surchargé. Perdéz vo p'tit colau pa
l'main èyè inmin-n'elle fai in tour à l'capelle du bos!
I n'faut nî vo desbiyî ou bîn vouloir fai des exploits in grimpyant dins les arb's.
Non:Seûl'mint (à l'ècart des aut's) li coyî in godet,li offri in l'ravisant dins les îs
èyè li dire:"Si vo savî comme ed'sûs binaise dè vo l'offri.Si vo sté d'accoûrd,
on r'couminch'ra l'année qui vînt èyè co les çiennes d'après"
Cwoyèm':Après ça,vo z'arèz djusse el timps d'rallér à vo maison,dè mett' el
godet dins in potiquet su l'tâb' dè nuit:Vo belle è n'rattind foque què vo lè
r'tournisse dins tous les sens comme si vo pèlî n'pètote.
Si vo n'âdje tape dins l'royette des pinsionnés,vo povèz prind' ène fleûr in
plastiqu':I faut l'arrosér moins souvint!

Du m'sins fin binaise dè vo z'avoû donné ène rich' idée.
Allez,bonS godetS èyè à l'prochaine!

Françwès.

Bîrâte = bientôt/mouson = museau/skèpi = éclos/deswan-nér = sortir (avec
difficultés)/pierrot = moineau/manoque = panier d'osier/mambournér =
bousculer/fertèyî = frétiller/coyî = cueillir/royette = tranche,fourchette.